

Lei 1/1991, do 15 de xaneiro, de presupostos xerais da Comunidade Autónoma de Galicia para 1991

Tramitación parlamentaria:

Proxecto de lei, BOPG núm. 74, do 8.11.1990.

Emendas á totalidade, BOPG núm. 87, do 29.11.1990.

Emendas parciais, BOPG núm. 90, do 11.12.1990.

Debate de totalidade, DSPG núms. 44, do 3.12.1990; 45, do 4.12.1990; 46, do 5.12.1990, e 47, do 7.12.1990.

Informe da Ponencia, BOPG núm. 94, do 17.12.1990.

Dictame da Comisión, BOPG núm. 99, do 29.12.1990.

Mantemento de emendas e votos particulares, BOPG núm. 99, do 29.12.1990.

Debate e aprobación polo Pleno, DSPG núms. 51, do 2.1.1991; 52, do 3.1.1991; 53, do 4.1.1991, e 54, do 5.1.1991.

Publicación:

Boletín Oficial do Parlamento de Galicia núm. 105, do 14.1.1991.

Diario Oficial de Galicia núm. 11, do 16.1.1991.

Boletín Oficial del Estado núm. 47, do 23.2.1991.

Lei 1/1991, do 15 de xaneiro, de presupostos xerais da Comunidade Autónoma de Galicia para 1991

Pola Lei 5/1991 foron modificados os importes dos conceptos retributivos do persoal en activo ó servizo da Comunidade Autónoma ó que se refire o título II.

Pola Lei 14/1991 foi modificado o artigo 4.d), parágrafo segundo.

Os presupostos xerais da Comunidade Autónoma de Galicia para 1991 xiran sobre o principio de oportunidade.

Os estados de gastos cuantifícanse e ordénanse para responder ás liñas de política económica do Goberno: profundar no gasto social e fomenta-lo desenvolvemento económico a través da creación e mellora de infraestructuras e axuda eficaz e racional ós sectores productivos, para alcanzar neste proceso o ano 1992 nas mellores condicións posibles.

As estimacións de ingresos non financeiros fórmulanse reflectindo o recorte introducido na porcentaxe de participación nos ingresos do Estado e no Fondo de Compensación Interterritorial, que constitúen os principais recursos da facenda autonómica. En vista disto, e tendo en conta a necesidade de mante-las políticas de gasto dimanantes da planificación económica, realízase unha decidida apelación ós ingresos de

carácter financeiro. Con isto conséguese paliar, en parte, o retroceso que experimentaría o necesario e vital crecemento económico e social da Comunidade Autónoma, na parte alícuota na que os ditos presupostos inciden no citado crecemento.

Neste contexto a lei reguladora dinamiza a actividade xurídico-económica contemplando novos feitos socio-políticos, dos que destacamos:

1.º) Un avance de suma importancia no ámbito social, ó instaurar-la renda de integración social, que lles permitirá ás persoas que carecen de medios económicos contar cun mínimo vital ata que consigan mellora-la súa situación.

2.º) En materia de función pública, establécense as normas que se deben observar respecto das relacións de postos de traballo, comprendendo desde o seu contido formal ata os órganos competentes para a súa modificación.

3.º) No campo da sanidade, prevese a transferencia de funcións e servicios do Instituto Nacional da Saúde e autorízase ó Goberno para a instrumentación presupostaria máis adecuada, no momento no que se produza.

4.º) Nace un novo organismo autónomo de carácter comercial, que se inclúe como tal no documento presupostario, o Instituto Galego das Artes Escénicas e Musicais, o cal lles dará nova forza a estes importantes campos do mundo galego da cultura.

5.º) Por último, para non facer máis extensa a exposición, só unha sucinta referencia: en canto a taxas, a modificación da tarifa de honorarios de veterinarios titulares na inspección de sanidade veterinaria de carnes frescas; no tocante a vivenda, a funcionalidade outorgada ás sociedades urbanísticas Gestur, das catro provincias galegas; e, en relación coa seguridade, as previsións de adquisición de equipo e medios destinados ós futuros membros integrantes da Policía Autonómica.

Por todo o exposto, o Parlamento de Galicia aprobou e eu, de conformidade co artigo 13.2 do Estatuto de Galicia e co artigo 24 da Lei 1/1983, do 22 de febreiro, reguladora da Xunta e do seu presidente, promulgo, en nome de El-Rei, a Lei de presupostos xerais da Comunidade Autónoma de Galicia para 1991.

Título I

Da aprobación dos presupostos e das súas modificacións

Capítulo I

Créditos iniciais e financiamento dos mesmos

Artigo 1. Dos créditos iniciais.

Un.— Apróbanse os presupostos xerais da Comunidade Autónoma de Galicia para o exercicio de 1991, integrados por:

a) O presuposto da Comunidade Autónoma.

b) Os presupostos dos organismos autónomos da Comunidade Autónoma de carácter administrativo.

c) O presuposto do organismo autónomo da Comunidade Autónoma de carácter industrial e financeiro, Instituto Galego da Vivenda e Solo.

d) O presuposto da Compañía de Radio-Televisión de Galicia e os das sociedades para a xestión dos servicios públicos de radiodifusión e televisión.

e) Os presupostos das empresas públicas galegas.

Dous.— No estado de gastos dos presupostos da Comunidade Autónoma concédense créditos para atende-lo cumprimento das súas obrigas por un importe de trescentos

oitenta e tres mil douscentos oitenta e sete millóns trescentas setenta mil pesetas (383.287.370.000 pesetas).

O presuposto de gastos da Comunidade Autónoma financiarase:

a) Cos dereitos económicos que se liquiden no exercicio, estimados nun importe de trescentos vinteseite mil douscentos oitenta e sete millóns trescentas setenta mil pesetas (327.287.370.000 pesetas).

b) Coas operacións de endebedamento reguladas no artigo 17 desta lei.

Os créditos correspondentes ós servicios transferidos do Instituto Nacional de Servicios Sociais, por un importe de catro mil novecentos sesenta millóns catrocentas sesenta mil pesetas (4.960.460.000 pesetas), están incluídos nos créditos consignados no estado de gastos citado e o seu financiamento nos dereitos económicos referidos neste número.

Os beneficios fiscais que afectarán ós tributos cedidos á Comunidade Autónoma estímense en mil novecentos trinta e sete millóns de pesetas (1.937.000.000 de pesetas).

Tres.— a) Os estados de gastos e ingresos dos organismos autónomos de carácter administrativo ascenden a cincocentos setenta e oito millóns duascentas mil pesetas (578.200.000 pesetas), co seguinte detalle:

Escola Galega de Administración Pública: 284.040.000 pesetas.

Instituto Galego de Estatística: 294.160.000 pesetas.

b) Os estados de gastos e ingresos dos organismos autónomos de carácter industrial, comercial, financeiro ou análogo, ascenden a trece mil catrocentos sesenta e sete millóns trescentas cincuenta mil pesetas (13.467.350.000 pesetas), co seguinte detalle:

Instituto Galego da Vivenda e Solo: 13.020.000.000 de pesetas.

Instituto Galego das Artes Escénicas e Musicais: 447.350.000 pesetas.

Catro.— No presuposto da Compañía de Radio-Televisión de Galicia concédense as dotacións necesarias para atende-lo desenvolvemento das súas actividades por un importe total de novecentos cincuenta millóns catrocentas oitenta e seis mil pesetas (950.486.000 pesetas), estimándose os seus recursos en igual contía.

Nos presupostos das sociedades para a xestión dos servicios públicos de radiodifusión e televisión a que se refire a Lei 9/1984, do 11 de xullo, concédense as seguintes dotacións:

Televisión de Galicia, Sociedade Anónima, por importe total de oito mil douscentos noventa e tres millóns setecentas setenta e seis mil pesetas (8.293.776.000 pesetas), ascendendo os recursos a igual contía.

Radiotelevisión de Galicia, Sociedade Anónima, por un importe total de seiscentos oitenta e cinco millóns trinta e nove mil pesetas (685.039.000 pesetas), ascenden do recursos a igual contía.

Cinco.— Nos presupostos das empresas públicas galegas inclúense as estimacións e previsións de gastos e ingresos referidos ás mesmas e ós seus estados financeiros en atención á peculiaridade da súa actividade específica.

Artigo 2. Distribución funcional dos créditos, transferencias internas entre entes e ingresos consolidados.

Un.— Os créditos incluídos nos capítulos I ó IX dos estados de gastos dos presupostos da Comunidade Autónoma e dos seus organismos autónomos agrúpanse en programas en función dos obxectivos que hai que conseguir. O seu importe consolidado, que ascende a trescentos oitenta e oito mil cento cincuenta e catro millóns vinte mil pesetas (388.154.020.000 pesetas), distribúese, en atención á índole das funcións que hai que realizar e polas contías que se detallan, en miles de pesetas, como segue:

Alta dirección da Comunidade Autónoma	2.646.054
Administración xeral	5.712.051
Seguridade Social e protección social	27.282.757
Promoción social	10.168.692
Protección Civil	572.408
Sanidade	10.800.488
Educación	127.926.229

Vivenda	14.455.285
Benestar comunitario	5.734.566
Cultura	12.924.417
Outros servizos comunitarios e sociais	8.098.714
Infraestructura básica e de transporte	32.341.692
Outras infraestructuras	12.824.988
Investigación científica, técnica e aplicada	2.119.283
Información estatística básica	394.160
Actuacións económicas xerais	1.516.550
Comercio	2.388.812
Actividades financeiras	3.408.007
Agricultura, gandería e pesca	21.778.823
Industria	1.213.154
Enerxía	3.350.000
Minería	187.000
Turismo	1.881.559
Reordenación industrial	6.629.408
Desenvolvemento empresarial	4.044.413
Transferencias a entidades locais	60.263.220
Débeda pública	7.491.290
Total	388.154.020

Dous.— As transferencias internas entre os entes referidos no artigo 1.1, letras a), b) e c), importan nove mil cento setenta e oito millóns novecentas mil pesetas (9.178.900.000 pesetas). Os créditos necesarios para a súa realización están incluídos nos importes consignados no número 2 do artigo anterior e teñen o seguinte detalle:

Destino	Miles de pesetas		
	OO.AA.	OO.AA.CC.	Total
Orixe	AA.	II. E FF.	
Xunta	578.200	8.600.700	9.178.900

Total 578.200 8.600.700 9.178.900

Tres.— Os ingresos consolidados dos entes a que se refire o punto anterior distribúense como segue:

Miles de pesetas				
Capítulos económicos	Capítulos I a VII Ing. non financ.	Capítulo VIII Act. financ.	Capítulo IX Pasi. financ.	Total ingresos
Entes				
Xunta	327.267.370	20.000	56.000.000	383.287.370
Organismos autónomos comerc., indust., financ. ou análogos	4.636.649	5.010	225.000	4.866.650
Total	331.904.010	25.010	56.225.000	388.154.020

Capítulo II

Réxime xeral dos créditos e das súas modificacións

Artigo 3. Principios xerais.

Durante a vixencia desta lei rexerán os seguintes principios sobre modificacións de créditos:

Un.— As modificacións dos créditos presupostarios axustaranse ó disposto nesta lei e ó disposto nesta materia pola Lei de xestión económica e financeira pública de Galicia, naqueles extremos que non resulten modificados por esta lei.

Dous.— Todo acordo de modificación presupostaria deberá indicar expresamente, ademais do ente público ou da sección a que se

refira, o programa, o servizo ou organismo autónomo, o artigo, o concepto e subconcepto afectado pola mesma, incluso naqueles casos nos que o crédito se consigne a nivel de artigo. Non obstante, as limitacións sinaladas no artigo 50.2 da Lei de xestión económica e financeira pública de Galicia entenderanse referidas a nivel de concepto para aqueles casos nos que vinculación establecida o sexa a nivel de artigo.

A correspondente proposta de modificación deberá expresa-la incidencia na consecución dos respectivos obxectivos de gasto e as razóns que a xustifican.

Tres.— Cando as modificacións autorizadas afecten a créditos do capítulo I, «Gastos de persoal», a Consellería de Economía e Facenda deberallas comunicar á da Presidencia e Administración Pública para o seu coñecemento.

Catro.— Para os efectos do establecido no punto 2 do artigo 52 da Lei de xestión económica e financeira pública de Galicia, se os ingresos referidos no punto 1 figuran no estado de ingresos do presuposto como recurso non financeiro, só se poderá xerar crédito pola diferenza en exceso do previsto e o efectivamente recadado. Corresponderalle á Consellería ou organismo autónomo solicita-la xeración correspondente.

O importe autorizado, agás que por lei ou convenio se estableza o seu destino específico, será dedi-

cado a financia-los gastos públicos no órgano pertinente, con carácter global.

Cinco.— A Consellería de Economía e Facenda, dentro dos primeiros quince días hábiles de cada mes, daralle conta á Comisión de Economía, Facenda e Presupostos do Parlamento de tódalas modificacións acordadas ó abeiro do establecido na presente lei.

Artigo 4. Competencias específicas en materia de modificacións presupostarias.

1. Con validez exclusiva para 1991 autorízanselle ó conselleiro de Economía e Facenda as seguintes competencias específicas en materia de modificacións presupostarias:

a) Para incorporar ó presuposto de 1991 os remanentes de crédito de exercicios anteriores existentes na sección 05, programas 721A e 721C, «Apoio á empresa agraria» e «Apoio á empresa industrial e de servizos», respectivamente, para os fins previstos na disposición adicional novena.

b) Para incorporar ó presuposto de 1991 os remanentes libres dos créditos 05.01.511A.657.11 e 05.01.511A.652.11 dos presupostos vixentes ó 31 de decembro de 1989 e 1990, respectivamente, destinados a actuacións na comarca de Ferrol.

c) Para incorporar ó presuposto de 1991 o remanente libre do crédito 04.08.121A.164, «Gastos sociais

de persoal», do presuposto de 1990.

d) Para xerar crédito no programa 531B, «Imprevistos e funcións non clasificadas», por un importe igual á diferenza que poida existir entre a liquidación definitiva da porcentaxe de participación nos ingresos do Estado en 1990 e a estimada no estado de ingresos para o presente exercicio.

Este crédito será destinado a ampliar-la dotación do Fondo Galego de Cooperación Local.⁽¹⁾

e) Para xerar créditos nos programas das consellerías correspondentes por un importe igual ós remanentes non utilizados e anteriores ó exercicio de 1988 do Fondo de Compensación Interterritorial, sempre que o seu financiamento se manteña nos presupostos xerais da Administración do Estado como crédito incorporado.

f) Xerar crédito polos ingresos de financiamento condicionado que por desfase entre a súa materialización e a recepción da documentación no exercicio seguinte requira a súa execución neste.

g) Para ampliar ata unha suma igual ás obrigas que se recoñezan, logo do cumprimento das formalidades legalmente establecidas ou das que se establezan e, en tódolos casos, dándolle conta trimestral-

(1) Reprodúcese a versión orixinaria. O segundo parágrafo da letra d) do artigo 4 foi modificado polo artigo único da Lei 14/1991.

mente ó Parlamento, os créditos que, incluídos no presuposto da Comunidade Autónoma, nos dos organismos autónomos e/ou nos doutros entres públicos aprobados por esta lei, se enumeran a seguir:

1.— As cotas de Seguridade Social e o complemento familiar, así como as aportacións que, se é o caso, lle corresponda efectuar á Comunidade Autónoma ó réxime de previsión social dos seus funcionarios.

2.— Os trienios derivados do cómputo do tempo de servizos realmente prestados á Administración.

3.— Os que se destinen ó pagamento de intereses, amortizacións do principal e gastos derivados da débeda pública emitida pola Comunidade Autónoma ou operacións de crédito concertadas por ela. Os pagamentos indicados aplicaranse, calquera que sexa o seu vencemento, ós respectivos créditos do exercicio económico de 1991.

4.— Os destinados ó pagamento das obrigas derivadas de crebas de operacións de crédito avaladas pola Xunta de Galicia, dándolle conta ó Parlamento no prazo de un mes.

5.— Os destinados a satisfacer as cantidades que deben percibirlos liquidadores dos distritos hipotecarios en concepto de indemnizacións e compensacións dos gastos orixinados pola recadación e xestión de autoliquidacións practicadas polo imposto sobre

transmisións patrimoniais e actos xurídicos documentados e pola recadación e práctica das liquidacións do imposto sobre sucesións e doacións.

6.— Os créditos destinados ó pagamento dos premios de cobranza e participacións en función da recadación de vendas e restantes créditos de vivendas, solares, locais e edificacións complementarias correspondentes ó Instituto Galego da Vivenda e Solo, así como os referentes ós traballos de facturación e apoio á xestión do patrimonio inmobiliario do devandito Instituto, que se establezan de acordo coas cifras recadadas no período voluntario.

7.— O crédito destinado ó financiamento de préstamos que se lle concedan ó persoal ó servizo da Administración autónoma en función da recadación que se produza como consecuencia de reintegros efectuados para a cancelación dos mesmos.

8.— Os créditos destinados a pagamentos de cotas e contribucións a organismos internacionais nos que participe ou sexa membro a Comunidade Autónoma.

9.— Os destinados ó pagamento dos premios de cobranza dos tributos e demais ingresos de dereito público da Comunidade Autónoma.

10.— Os que se deriven do cumprimento de sentencias firmes.

11.— Os créditos de transferencia a favor da Xunta de Gali-

cia que figuren nos presupostos de gastos dos organismos autónomos, ata o importe dos remanentes da tesourería que resulten como consecuencia da xestión dos mesmos.

12.— O crédito 04.04.231A.226.09, destinado á cobertura de necesidades de toda orde motivadas por sinistros, catástrofes ou outros de recoñecida urxencia.

13.— O crédito 09.03.212A.486, destinado á cobertura da renda de integración social de Galicia, ata un límite máximo de 1.500.000.000 de pesetas.

14.— O crédito 05.05.531B.130.02 para lle satisfacer ó persoal laboral ó servizo da Comunidade Autónoma a primeira fase de compensación económica destinada á consecución dos obxectivos asignados ós entes e organismos desta Comunidade mediante o incremento da produtividade, pola diferenza que poida resultar na execución desta primeira fase.

15.— O crédito 05.05.531B.130.03, destinado ó pagamento da repercusión do incremento do 4% na masa salarial fixada no 31 de decembro de 1988 para o aumento de retribucións ó persoal laboral para 1989, segundo sentenza do 4 de maio de 1990 do Xulgado do Social de Santiago de Compostela, confirmada pola Sala do Social do Tribunal Superior de Xusticia de Galicia do 9 de agosto do mesmo ano, pola diferenza que poida resultar entre a previsión e a súa

aplicación efectiva.

Será facultade da Consellería de Economía e Facenda, en consideración ó nivel en que se veñan desenvolvendo os ingresos, reter crédito noutros conceptos presupostarios, para financia-las ampliacións deste epígrafe.

Título II

Dos gastos de persoal⁽²⁾

Capítulo I

Retribucións do persoal

Artigo 5. Aumento de retribucións do persoal ó servizo da Comunidade Autónoma.

Un.— Con efectos do 1 de xaneiro de 1991, a contía dos componseiros das retribucións do persoal ó servizo da Comunidade Autónoma, excepto o sometido á lexislación laboral, experimentará o seguinte incremento con respecto ás establecidas para o exercicio de 1990:

a) As retribucións básicas deste persoal, así como as complementarias de carácter fixo e periódico asignadas ós postos de traballo

(2) Reprodúcese a versión orixinaria. Os importes dos conceptos retributivos do persoal en activo ó servizo da Comunidade Autónoma ó que se refire o título II foron modificados polos artigos 2 e 3 da Lei 5/1991.

que desempeña, experimentarán un incremento de 6,26%, sen prexuício, se é o caso, da adecuación destas últimas cando sexa necesaria para asegurar que a retribución total de cada posto de traballo garde a relación procedente co contido de especial dificultade técnica, dedicación, responsabilidade, perigosidade e penosidade do mesmo.

b) O conxunto das restantes retribucións complementarias terá así mesmo un crecemento do 6,26%, sen prexuício das modificacións que se deriven da variación do número de efectivos asignados a cada programa, do grao de consecución dos obxectivos fixados para o mesmo e do resultado individual da súa aplicación.

c) Os complementos persoais e transitorios e as demais retribucións que teñan análogo carácter rexeranse pola súa normativa específica e polo disposto nesta lei, quedando excluídos do aumento do 6,26% previsto na mesma.

d) O complemento familiar rexerase pola súa normativa específica, excluíndose do aumento a que se refire a presente lei.

e) As indemnizacións por razón do servizo rexeranse pola súa normativa específica.

Dous.— O incremento de retribucións previsto no presente artigo é aplicable ó persoal non laboral ó servizo de:

a) Os órganos estatutarios de Galicia, sen prexuício do disposto no artigo 12.2 do Estatuto de Galicia para o Parlamento.

b) A Administración da Comunidade Autónoma e os seus organismos autónomos.

c) A Compañía de Radio-Televisión de Galicia e as sociedades para a xestión dos servizos públicos de radiodifusión e televisión.

d) A Universidade.

e) O restante persoal ó que lle resulte de aplicación o réxime estatutario dos funcionarios públicos.

Tres.— Así mesmo, e con efectos do 1 de xaneiro de 1991, a masa salarial do persoal laboral dos entes e organismos que se indican no número anterior non poderá experimentar un incremento global superior ó 6,26%, comprendendo nesta porcentaxe o de tódolos conceptos, sen prexuício do que se puidese derivar da consecución dos obxectivos asignados a cada ente ou organismo mediante o incremento da produtividade ou a modificación dos sistemas de organización do traballo ou clasificación profesional.

O previsto no parágrafo anterior representa o incremento máximo da masa salarial, cunha distribución e aplicación individual que se producirá a través da negociación colectiva.

Entenderase por masa salarial, para os efectos desta lei, o con-

xunto das retribucións salariais e extrasalariais e os gastos de acción social devengados durante 1990 polo persoal laboral afectado, co límite das contías sobre as que emitiu informe favorable a Consellería de Economía e Facenda para o devandito exercicio presupostario, exceptuándose, en todo caso:

a) As prestacións e indemnizacións da Seguridade Social.

b) As cotizacións ó sistema da Seguridade Social a cargo do empregador.

c) As indemnizacións correspondentes a traslados, suspensións ou despedimentos.

d) As indemnizacións ou os suplidos por gastos que tivese que realiza-lo traballador.

Os incrementos da masa salarial bruta calcularanse en termos de homoxeneidade respecto dos dous períodos obxecto de comparación, tanto no que respecta a efectivos reais de persoal laboral e antigüidade do mesmo coma ó réxime privativo de traballo, xornada legal ou contractual, horas extraordinarias efectuadas e outras condicións laborais, computándose, en consecuencia, por separado as cantidades que correspondan á variación de tales conceptos. Con cargo á masa salarial así obtida para 1991 deberase satisfacer a totalidade das retribucións do persoal laboral derivadas do pertinente acordo

e tódalas que se produzan ó longo do ano 1991, agás as que lle corresponda devengar ó devandito persoal no citado ano polo concepto de antigüidade.

As indemnizacións ou os suplidos deste persoal non poderán experimentar crecementos superiores ós que se establezan con carácter xeral para o persoal non laboral da Administración da Comunidade Autónoma.

Catro.— Sen prexuício do previsto nos números anteriores, no capítulo I do programa 531B, «Imprevistos e funcións non clasificadas», fanse as previsións necesarias para atender a satisfacer ó persoal laboral ó servizo da Comunidade Autónoma a primeira fase de compensación económica destinada á consecución dos obxectivos asignados ós entes e organismos desta Comunidade mediante o incremento da produtividade, así como a repercusión para 1991 do incremento do 4% na masa salarial fixada no 31 de decembro de 1988, para o aumento das retribucións ó persoal laboral para 1989, segundo sentenza do 4 de maio de 1990, e o importe global asignado ó complemento de produtividade e ás gratificacións por servizos especiais e extraordinarios, que distribuirán os distintos departamentos conforme ós criterios a que se refire o punto Un, letras e) e f), do artigo 8 desta lei.

Artigo 6. Retribucións dos altos cargos.

Un.— As retribucións totais e exclusivas, incluídas as pagas extraordinarias, dos altos cargos fíxanse para o ano 1990 nas seguintes contías:

Presidente	9.935.204
Conseleiros	8.181.407
Secretarios xerais técnicos, directores xerais e asimilados	6.513.449

Dous.— Os altos cargos terán dereito á percepción dos trienios que puidesen ter recoñecidos como funcionarios e persoal ó servizo das administracións públicas.

Tres.— As retribucións dos presidentes e vicepresidentes e, se é o caso, as dos directores xerais, cando lles corresponda o exercicio das funcións executivas de máximo nivel dos entes e das entidades de dereito público a que se refire o artigo 7.1.b) da Lei de xestión económica e financeira pública de Galicia, serán autorizadas polo conselleiro de Economía e Facenda, por proposta do titular da Consellería á que se atopen adscritos.

Artigo 7. Retribucións dos delegados provinciais e territoriais das consellerías.

As retribucións dos delegados provinciais e territoriais das consellerías serán idénticas ás dos subdirectores xerais da Xunta, tanto na súa contía coma respecto dos conceptos que as compoñen.

Terán dereito a percibi-los trienios que puidesen ter recoñecidos

como funcionarios e persoal ó servizo das administracións públicas.

Artigo 8. Retribucións dos funcionarios da Comunidade Autónoma incluídos no ámbito de aplicación da Lei 4/1988, do 26 de maio.

Un.— De conformidade co establecido no artigo 5.1 desta lei, as retribucións que percibirán no ano 1991 os funcionarios incluídos no ámbito de aplicación da Lei 4/1988, que desempeñan postos de traballo para os que o Goberno da Comunidade aprobou a aplicación do réxime retributivo previsto na devandita lei, serán as seguintes:

a) O soldo e os trienios que correspondan ó grupo no que se atope clasificado o corpo ou a escala a que pertenza o funcionario, de acordo coas seguintes contías referidas a doce mensuralidades:

Grupo	Soldo	Trienios
A	1.567.116	60.156
B	1.330.068	48.132
C	991.464	36.108
D	810.696	24.096
E	740.088	18.072

b) As pagas extraordinarias, que serán dúas ó ano, por un importe cada unha delas de unha mensuralidade do soldo e trienios e que se devengarán de acordo co previsto no artigo 15 da Lei 13/1988.

c) O complemento de destino

correspondente ó nivel do posto de traballo que se desempeñe, de acordo coas seguintes contías referidas a doce mensualidades:

Nivel	Pesetas
30	1.376.088
29	1.234.332
28	1.182.408
27	1.130.484
26	991.776
25	879.936
24	828.012
23	776.112
22	724.176
21	672.360
20	624.552
19	592.632
18	560.748
17	528.840
16	496.968
15	465.060
14	433.164
13	401.256
12	369.348
11	337.488
10	305.592
9	289.644
8	273.672
7	257.748
6	241.776
5	225.828
4	201.936
3	178.044
2	154.128
1	130.248

No ámbito da docencia universitaria, a contía do complemento de destino fixada na escala anterior poderá ser modificada nos casos en que así proceda, de acordo coa

normativa vixente, sen que isto implique variación do nivel de complemento de destino asignado ó posto de traballo.

d) O complemento específico que, se é o caso, estea fixado ó posto que se desempeñe, do que a súa contía experimentará un incremento do 6,26% respecto da aprobada para o exercicio de 1990, sen prexuício, se é o caso, do previsto no artigo 5.Un.a) desta lei.

e) O complemento de produtividade, que retribuirá o especial rendemento, a actividade e dedicación extraordinaria, o interese ou a iniciativa con que se desempeñen os postos de traballo, sempre que redunden en mellora-lo resultado do mesmo.

1.— En ningún caso as contías asignadas por complemento de produtividade durante un período de tempo orixinarán ningún tipo de dereito individual respecto das valoracións ou apreciacións correspondentes a períodos sucesivos.

2.— O complemento de produtividade será concedido polos conselleiros ou xefes de unidades ós que se lles asignasen créditos globais para a súa atención, de acordo cos criterios que aprobe o Consello da Xunta por proposta das consellerías da Presidencia e Administración Pública e de Economía e Facenda.

f) As gratificacións por servizos extraordinarios que concederá o

Consello da Xunta por proposta da Consellería correspondente e dentro dos créditos asignados para tal fin.

Estas gratificacións terán carácter excepcional e soamente poderán ser recoñecidas polos servizos extraordinarios prestados fóra da xornada normal de traballo, sen que, en ningún caso, poidan ser fixas na súa contía nin periódicas no seu devengo.

A Xunta de Galicia remitiralle semestralmente á Comisión 3.^a, Economía, Facenda e Presupostos do Parlamento de Galicia, relación nominal, cos respectivos importes, das devanditas gratificacións por servizos extraordinarios.

g) Os complementos persoais e transitorios recoñecidos en cumprimento do disposto no artigo 10 da Lei 13/1988, do 30 de decembro, de presupostos xerais da Comunidade Autónoma para 1989.

Estes complementos persoais e transitorios serán absorbidos por calquera mellora retributiva que se produza no ano 1991, incluídas as derivadas do cambio de posto de traballo.

Incluso no caso de que o cambio de posto de traballo determine unha diminución das retribucións manterase o complemento persoal transitorio fixado ó producirse a aplicación do novo sistema, á absorción do cal se lle imputará calquera mellora retributiva ulterior, incluso as que poidan derivarse do cambio de posto de traballo.

Para efectos da absorción prevista nos parágrafos anteriores, o incremento de retribucións de carácter xeral que se establece nesta lei só se computará no 50% do seu importe, entendendo que teñen este carácter o soldo, referido a catorce mensualidades, o complemento de destino e o específico. En ningún caso se considerarán os trienios, o complemento de produtividade, nin as gratificacións por servizos extraordinarios.

Dous.— Os funcionarios interinos incluídos no ámbito de aplicación da Lei 4/1988, a excepción dos docentes universitarios, percibirán o 100% das retribucións básicas, excluídos trienios, correspondentes ó grupo no que estea incluído o corpo en que ocupen vacante e o 100% das retribucións complementarias que correspondan ó posto de traballo que desempeñen.

Tres.— O complemento de produtividade poderá atribuírseles, se é o caso, ós funcionarios interinos a que se refire o punto anterior, así como ós funcionarios eventuais e ós funcionarios en prácticas cando as mesmas se realicen desempeñando un posto de traballo e estea autorizada a aplicación do devandito complemento ós funcionarios de carreira que desempeñen análogos postos de traballo.

Catro.— No ámbito da docencia universitaria os funcionarios inte-

rinós percibirán o 100% das retribucións básicas, excluídos trienios, correspondentes ó grupo no que estea incluído o corpo en que ocupen vacante e as retribucións complementarias que procedan, de acordo coa normativa aplicable ós mesmos.

Artigo 9. Aumento de retribucións en casos especiais.

Os funcionarios dos corpos de sanitarios locais que presten servizos en partidos sanitarios, casas de socorro e, se é o caso, hospitais municipais experimentarán en 1991 un incremento do 6,26% sobre as correspondentes retribucións básicas percibidas no ano 1990.

As retribucións complementarias destes funcionarios fixaranse con base no disposto no Decreto 3206/1967, do 28 de decembro, incrementando, se é o caso, os importes no 6,26% respecto de 1990.

Os sanitarios locais non comprendidos nos números anteriores percibirán as retribucións básicas e complementarias que lles correspondan en aplicación do disposto no artigo 5 desta lei.

Capítulo II

Outras disposicións
en materia de réxime
do persoal activo

Artigo 10. Relacións de postos de traballo.

Un.— As relacións de postos de traballo de persoal funcionario e laboral comprenden os postos de traballo de cada centro xestor, con expresión de:

a) A denominación e as características esenciais dos postos.

b) Os requisitos esixidos para o seu desempeño.

c) O nivel de complemento de destino, se é o caso, o complemento específico que lles corresponda ós mesmos, cando haxan de ser desempeñados por persoal funcionario, ou a categoría profesional e o réxime xurídico aplicable, cando haxan de ser desempeñados por persoal laboral.

Dous.— Os créditos de gastos de persoal suxeitaranse ó previsto nos artigos 49 e 50 da Lei 3/1984, do 3 de abril, e non implicarán, en ningún caso, recoñecemento de dereitos nin modificación das relacións dos postos de traballo, nin estas, á súa vez, condicionarán necesariamente a contía dos citados créditos.

Tres.— A creación, modificación, refundición e supresión dos postos de traballo realízanse a través das relacións de postos de traballo.

Catro.— Correspóndelles ás consellerías da Presidencia e Administración Pública e de Economía e Facenda, sen prexuício do disposto no artigo 12.8 da Lei 4/1988, da función pública de Galicia, a aprobación, mediante

resolución conxunta, de:

a) As modificacións nas relacións de postos de traballo producidas por variación no número de postos recollidos nas relacións iniciais.

b) A asignación do nivel de complemento de destino e, se é o caso, o complemento específico correspondente a novos postos non comprendidos nas relacións de postos de traballo.

c) As modificacións de complemento de destino e específico dos postos incluídos nas devanditas relacións.

d) As remuneracións correspondentes a postos de nova creación adscritos a persoal laboral.

Cinco.— Os titulares de postos de traballo que se supriman nas relacións de postos continuarán percibindo ata que sexan nomeados para desempeñar outros postos de traballo e durante un prazo máximo de tres meses contados a partir da data na que surtiu efectos económicos a citada supresión, co carácter de a conta do que lle corresponda polo novo posto de traballo, as retribucións complementarias correspondentes ó posto suprimido, sen que proceda ningún reintegro no caso de que as cantidades percibidas a conta fosen superiores.

Seis.— A provisión de postos de traballo que vai desempeña-lo persoal funcionario ou a formaliza-

ción de novos contratos de traballo do persoal laboral fixo, así como a modificación da categoría profesional destes últimos, requirirá, ademais de que os correspondentes postos figuren detallados nas respectivas relacións, que o seu custo, en cómputo anual, estea dotado presupostariamente ou, no seu defecto, sexa autorizado pola Consellería de Economía e Facenda.

Sete.— As prazas dotadas que non se inclúan ou cubran coas convocatorias de probas selectivas e as que se doten con posterioridade á dita oferta poderán ser obxecto de sucesivas convocatorias dentro do mesmo exercicio, sen que poidan transcorrer máis de seis meses entre a convocatoria e o inicio das correspondentes probas, e sen prexuício dos cursos selectivos de formación que se establezan.

Oito.— As convocatorias para o ingreso en corpos e escalas de funcionarios da Administración da Comunidade Autónoma e dos seus organismos autónomos requirirán o informe favorable da Consellería de Economía e Facenda respecto da existencia de dotación presupostaria.

Nove.— A formalización de novos contratos de traballo de persoal laboral fixo e eventual e a modificación da categoría profesional dos traballadores xa contratados requirirán a existencia do crédito necesario para atende-lo pagamento das súas retribucións.

Artigo 11. Prohibición de ingresos atípicos.

Durante o ano 1991, os empregados públicos comprendidos dentro do ámbito de aplicación da presente lei, con excepción daqueles sometidos ó réxime de arancel, non poderán percibir ningunha participación nos tributos, nas comisións ou noutros ingresos de calquera natureza que lle correspondan á Administración ou a calquera poder público como contraprestación de calquera servizo ou xurisdicción, nin participación ou premio en multas impostas aínda que estivesen normativamente atribuídos ós mesmos, debendo percibir unicamente as remuneracións do correspondente réxime retributivo e sen prexuício do que resulte da aplicación do sistema de incompatibilidades.

Artigo 12. Outras normas comúns.

Un.— Cando as retribucións percibidas no ano 1990 non se correspondesen coas establecidas con carácter xeral no título II da Lei 2/1990 e non sexan de aplicación as establecidas no mesmo título da presente lei, continuaránse percibindo as mesmas retribucións ca no ano 1990, incrementadas no 6,26%.

Dous.— Na Administración da Comunidade Autónoma e dos seus organismos autónomos, nos casos de adscrición durante 1991 dun funcionario suxeito a un réxime retributivo distinto do correspon-

dente ó posto de traballo a que se adscribe, o devandito funcionario percibirá as retribucións que correspondan ó posto de traballo que desempeñe, logo da oportuna asimilación que autorice a Consellería da Presidencia e Administración Pública por proposta das consellerías interesadas.

Só para os efectos da asimilación a que se refire o parágrafo anterior, a Consellería da Presidencia e Administración Pública poderá autorizar que a contía da retribución por antigüidade sexa a que proceda de acordo co réxime retributivo de orixe do funcionario.

A Consellería da Presidencia e Administración Pública comunicalle estas autorizacións á Consellería de Economía e Facenda para o seu coñecemento.

Tres.— As referencias relativas a retribucións contidas na presente lei enténdense sempre feitas a retribucións íntegras.

Catro.— As referencias contidas na normativa vixente relativas a haberes líquidos para os efectos do cálculo de anticipos reintegrables ós funcionarios entenderanse feitas ás retribucións básicas e complementarias que perciban os mesmos nos seus importes líquidos.

Artigo 13. Modificacións do réxime do persoal funcionario.

Os funcionarios de carreira que desempeñen ou desempeñasen postos na Administración central e

institucional da Comunidade Autónoma comprendidos no ámbito de aplicación da Lei 25/1983, do 26 de decembro, sobre incompatibilidades de altos cargos, consolidarán, con efectos económicos desde a aprobación da presente lei, o grao persoal correspondente ó nivel de complemento de destino 30.

Para obter esta consolidación estes postos debéronse desempeñar durante máis de dous anos continuados ou tres con interrupción, a partir do primeiro de xaneiro de 1982.

Artigo 14. Requisitos para a determinación ou modificación de retribucións do persoal laboral e non funcionario.

Un.— Durante o ano 1991, será preciso informe favorable conxunto da Consellería da Presidencia e Administración Pública e da de Economía e Facenda para proceder a determinar ou modificar as condicións retributivas do persoal non funcionario e laboral ó servizo de:

a) A Administración da Comunidade Autónoma e os seus organismos autónomos.

b) O Consello de Contas.

c) O Consello da Cultura Galega.

d) A Compañía de Radio-Televisión de Galicia e as súas sociedades xestoras.

e) A Universidade.

Dous.— Con carácter previo ó comenzo das negociacións de convenios ou acordos colectivos que se celebren no ano 1991, deberase solicitar da Consellería de Economía e Facenda a correspondente autorización de masa salarial, que cuantifique o límite máximo das obrigas que se poidan contraer como consecuencia dos devanditos pactos, aportando para o efecto a certificación das retribucións salariais satisfeitas e devengadas en 1990.

Cando se trate de persoal non suxeito a convenio colectivo, do cal as retribucións veñan determinadas en todo ou en parte mediante contrato individual, deberán comunicárselle á Consellería de Economía e Facenda as retribucións satisfeitas e devengadas durante 1990, que servirán de base para a aplicación dos incrementos retributivos para 1991.

Para a determinación das retribucións de postos de traballo de nova creación bastará coa emisión do informe a que se refire o punto 1 do presente artigo.

Tres.— Para os efectos dos epígrafes anteriores, entenderase por determinación ou modificación de condicións retributivas do persoal non funcionario as seguintes actuacións:

a) Asinamento de convenios colectivos subscritos polos organismos sinalados no punto 1 anterior, así como as súas revisións e as adhesións ou extensións ós

mesmos.

b) Aplicación de convenios colectivos de ámbito sectorial, así como as súas revisións e as adhesións ou extensións ós mesmos.

c) Fixación de retribucións mediante contrato individual, xa se trate de persoal fixo ou contratado por tempo determinado, cando non veñan reguladas en todo ou en parte mediante convenio colectivo.

d) Outorgamento de calquera clase de melloras salariais de tipo unilateral con carácter individual ou colectivo, aínda que se deriven da aplicación extensiva do réxime retributivo dos funcionarios públicos.

Catro.— Co fin de emitilo informe sinalado no punto Un deste artigo, as consellerías, os organismos e os entes remitiranlles ás consellerías de Economía e Facenda e da Presidencia e Administración Pública o correspondente proxecto, con carácter previo ó seu acordo ou asinamento no caso dos convenios colectivos ou contratos individuais, acompañando a valoración de tódolos seus aspectos económicos.

Cinco.— O sinalado informe será cumprimentado no prazo máximo de quince días, que se contarán desde a data de recepción do proxecto e da súa valoración, e versará sobre todos aqueles extremos dos que se deriven consecuencias directas ou indirectas en

materia de gasto público, tanto para o ano 1991 coma para exercicios futuros, e, especialmente, no que se refire á determinación da masa salarial correspondente e ó control do seu crecemento, sen prexuízo do disposto no artigo 5. Tres desta lei.

Seis.— Serán nulos de pleno dereito os acordos adoptados nesta materia con omisión do trámite de informe ou en contra dun informe desfavorable, así como os pactos que impliquen crecements salariais para exercicios sucesivos contrarios ós que determinen as futuras leis de presupostos.

Sete.— Non poderán autorizarse gastos derivados da aplicación das retribucións para 1991 sen o cumprimento dos requisitos establecidos no presente artigo.

Artigo 15. Contratación de persoal laboral con cargo ós créditos de investimentos.

Un.— As consellerías e os organismos autónomos poderán formalizar durante 1991, con cargo ós respectivos créditos de investimentos, contratacións de persoal de carácter temporal para a realización de obras ou servicios, sempre que se dea a concorrencia dos seguintes requisitos:

a) Que a contratación teña por obxecto a execución de obras por administración directa e con aplicación da lexislación de contratos do Estado, ou a realización de ser-

vicios que teñan a natureza de investimentos.

b) Que tales obras ou servicios correspondan a investimentos previstos e aprobados nos presupostos xerais da Comunidade Autónoma.

c) Que as obras ou os servicios non poidan ser executados co persoal fixo do cadro de persoal e non exista dispoñibilidade suficiente no crédito presupostario destinado á contratación de persoal.

Dous.— Os contratos terán que formalizarse seguindo as prescricións dos artigos 15 e 17 do Estatuto dos traballadores, aprobado pola Lei 8/1980, do 10 de marzo, na redacción dada pola Lei 32/1984, do 2 de agosto, e conforme ó disposto na Lei 53/1984, do 26 de decembro, de incompatibilidades do persoal ó servizo da Administración pública. Nos contratos farase constar, cando proceda, a obra ou o servizo para a realización do cal se formaliza o contrato e o tempo de duración, así como o resto das formalidades que impón a lexislación sobre contratos laborais, eventuais ou temporais. Os incumprimentos destas obrigas formais, así como a asignación de persoal contratado para funcións distintas das que se determinen nos contratos, dos que se puidesen derivar dereitos de fixeza para o persoal contratado, poderán dar lugar á esixencia de responsabilidades, segundo o

artigo 95 da Lei 3/1984, do 3 de abril, de xestión económica e financeira pública de Galicia.

Tres.— A contratación poderá exceder do exercicio presupostario cando se trate de obras ou servizos que sobrepassen o devandito exercicio e correspondan a proxectos de investimento de carácter plurianual que cumpran os requisitos que para estes se prevén no artigo 44 da Lei de xestión económica e financeira pública de Galicia ou nesta propia Lei de presupostos xerais da Comunidade Autónoma para 1991.

Catro.— O servizo xurídico da Consellería, organismo ou entidade terá que emitir informe sobre os contratos, con carácter previo á súa formalización, e, en especial, pronunciarase sobre a modalidade de contratación utilizada e a observancia nas cláusulas do contrato dos requisitos e das formalidades esixidos pola lexislación laboral.

Cinco.— A realización dos contratos regulados no presente artigo será obxecto de fiscalización previa nos casos en que a mesma resulte preceptiva de conformidade co disposto nos artigos 76 a 90 da Lei de xestión económica e financeira pública de Galicia. Para estes efectos, os créditos de investimentos entenderanse axeitados para a contratación de persoal eventual se non existe crédito suficiente para iso no concepto presu-

postario destinado especificamente á devandita finalidade.

Nos organismos autónomos da Comunidade Autónoma con actividades industriais, comerciais, financeiras e análogas, esta contratación requirirá informe favorable do correspondente interventor delegado, que versará sobre a non dispoñibilidade de crédito no concepto presupostario destinado á contratación de persoal eventual no capítulo correspondente. No caso de desconformidade co informe emitido, o organismo autónomo poderá elevarlle o expediente á Consellería de Economía e Facenda para a súa resolución.

Seis.— A Xunta de Galicia remitiralle semestralmente á Comisión 3.^a, Economía, Facenda e Presupostos, do Parlamento de Galicia a relación das contratacións realizadas no semestre anterior ó abeiro deste artigo, no caso de as haber.

Artigo 16. Autorización dos custos de persoal das universidades de competencia da Comunidade Autónoma.

Un.— De conformidade co disposto no artigo 54.4 da Lei orgánica 11/1983, do 25 de agosto, de reforma universitaria, en relación coa súa disposición final segunda, autorízanse os custos de persoal funcionario docente e non docente e contratado docente das universidades de competencia da Administración autónoma polos

importes detallados no anexo 1 desta lei.

Dous.— As universidades de competencia da Administración da Comunidade Autónoma ampliarán os seus créditos do capítulo I en función da distribución que do crédito 07.04.322C.442 realice a Consellería de Educación e Ordenación Universitaria, caso no que non será de aplicación o contido no artigo 55.1 da citada Lei orgánica de reforma universitaria.

Título III

Das operacións financeiras

Capítulo I

Avales

Artigo 17. Avales.

Un.— A Comunidade Autónoma durante o exercicio de 1991 poderá avalar operacións de crédito a favor dos seus organismos autónomos, empresas públicas ou participadas, corporacións locais e empresas privadas, por un importe máximo de 5.000 millóns de pesetas, nos termos legais que se mencionan a continuación e nos regulamentarios que se establezan. Os devanditos avales poden estenderse a operacións de pagamentos aprazados e referirse a plans de investimento, aínda que, en todo caso, definidos temporalmente e cun límite máximo de garantía por entidade avalada.

Dous.— Ata un importe de

3.500 millóns de pesetas, a Comunidade Autónoma poderá outorgar un primeiro aval no que se acorde a renuncia ó beneficio de exclusión que establece o artigo 1830 do Código civil, para os créditos e/ou pagamentos aprazados de plans de investimento concertados para as corporacións locais, organismos autónomos, entes e empresas públicas da Comunidade Autónoma de Galicia.

Tres.— Dentro do importe máximo do punto anterior, a Comunidade Autónoma poderá conceder, nas condicións que regulamentariamente se establezan, aval subsidiario ós créditos concertados polas empresas e operacións que se especifican:

a) Ós armadores de buques por encargos a empresas do sector naval domiciliadas en Galicia, mentres non sexa tecnicamente posible a constitución de hipoteca naval dos buques en construción.

b) Ás empresas que polas súas características específicas sectoriais sexan susceptibles de recibir axudas pola Comunidade Autónoma para a creación e o mantemento das mesmas, sempre que os créditos para os que se solicite aval teñan como finalidade o financiamento de investimentos.

c) Ás empresas participadas pola Comunidade Autónoma e SODIGA para o financiamento de operacións de igual finalidade e natureza á descrita no punto anterior.

d) Ás cooperativas de traballadores autónomos da Comunidade Autónoma, sempre que os créditos para os que se solicite aval teñan a finalidade de financiar operacións de investimentos realizadas polos citados axentes.

e) A empresas privadas galegas para operacións de prefinanciamento de exportacións.

f) Ás sociedades anónimas laborais, cooperativas de traballadores, sociedades agrarias de transformación e outras similares, para operacións de investimentos e, no momento da súa constitución, de saneamento financeiro realizadas polas mesmas.

g) Ás cooperativas agrarias, SATS e APAS para operacións de crédito sempre que este teña por finalidade a adquisición de activos financeiros en empresas lácteas domiciliadas ou que se constituán en Galicia coa finalidade de potenciar un grupo lácteo galego.

Catro.— Na distribución e adxudicación dos avales regulados no punto anterior establécese unha prioridade en función da conxunción dos seguintes criterios:

a) Os indicados na letra f) do punto anterior.

b) Iniciativas que supoñan alternativas reais de saída para factorías, empresas ou sectores en crise.

c) Empresas de sectores punta ou potencial relevancia para o

desenvolvemento económico da Comunidade Autónoma.

d) Iniciativas empresariais que supoñan unha maior captación de mercados exteriores.

Cinco.— Poderase conceder un aval complementario ó prestado polas sociedades de garantía recíproca galegas que cubra a maior contía solicitada sobre a máxima que estatutariamente lles poden outorgar estas institucións ás empresas privadas domiciliadas na Comunidade Autónoma, e ó emprestado por outras entidades de crédito e seguro, en créditos que teñan como finalidade o financiamento de investimentos. Os ditos avales serán da mesma natureza xurídica cós contemplados no punto Tres deste artigo, e terán como límite global de garantía o importe de 2.000 millóns de pesetas.

Seis.— A contía dos avales, por beneficiario e alínea, non poderá exceder do 5% da cantidade global establecida no número Un deste artigo. Este límite será do 10% nos avales que se poidan conceder ó abeiro do disposto nas alíneas Tres.a), Tres.c) e Tres.g) do presente artigo.

Para os efectos de fixa-los límites establecidos neste número, acumularanse os avales vixentes xa coñecidos.

Sete.— Os avales que se concedan ó abeiro do disposto nos puntos anteriores garantirán un máxi-

mo do 80% final da contía da operación para a que se concede ó aval, excepto os que se concedan ó abeiro do previsto no punto Cinco, no que o aval pode cubri-la totalidade da operación de crédito.

Oito.— Non se lles imputará ós límites indicados no punto Un o importe dos avales que se presten por motivo de refinanciamento ou substitución de operacións de crédito, na medida en que impliquen cancelación de avales anteriormente concedidos.

Nove.— O Goberno comunica-lle á Comisión de Economía, Facenda e Presupostos, con periodicidade trimestral, o importe e as características dos avales concedidos ó abeiro do presente capítulo.

Capítulo II

Operacións de crédito

Artigo 18. Operacións de crédito.

Un.— Autorízase ó Consello da Xunta para que, por proposta do conselleiro de Economía e Facenda, proceda, tanto no interior coma no exterior, a emitir débeda pública da Comunidade en calquera das súas modalidades, negociable ou non negociable, así como a concertar con institucións financeiras operacións de crédito amortizable por prazo superior a un ano ata un importe máximo de 56.000 millóns de pesetas, e con destino a operacións de capital.

Dous.— Autorízase ó conselleiro

de Economía e Facenda para que:

a) Sinale o tipo de interese, condicións, beneficios fiscais legalmente establecidos e demais características das operacións de endebedamento sinaladas no número anterior e formalice, se é o caso, en representación da Comunidade Autónoma, tales operacións, adaptándose sempre que sexa preciso ás prácticas financeiras que xurdan da evolución dos mercados financeiros.

b) Proceda, ó abeiro do disposto nas respectivas normas de emisión ou contratación, ó reembolso anticipado de emisións de débeda da Comunidade Autónoma ou de créditos recibidos, ou á revisión dalgunha das súas condicións, cando a situación do mercado ou outras circunstancias así o aconsellen.

c) Concerte operacións de cambio, conversión, prórroga ou intercambio financeiro, relativas a operacións de crédito existentes con anterioridade, para obter un menor custo ou unha mellor distribución da carga financeira ou preve-los posibles efectos derivados das fluctuacións nas condicións de mercado.

Tres.— As operacións que se realicen ó abeiro da autorización a que fai referencia o número Un deste artigo poderanse formalizar no transcurso de dous anos a partir da data da publicación da presente lei no *Diario Oficial de Galicia*.

Catro.— A Xunta comunicaralle á Comisión de Economía, Facenda e Presupostos do Parlamento de Galicia, con periodicidade trimestral, o importe e as características principais das operacións de crédito realizadas ó abeiro das autorizacións contidas neste artigo.

Artigo 19. Débeda da Tesourería.

Durante o exercicio de 1991, o Goberno, por proposta da Consellería de Economía e Facenda, poderá emitir débeda da Tesourería e concertar operacións de crédito con termo de reembolso igual ou inferior a un ano por un importe máximo do 10% da participación en ingresos do Estado, destinado a atender necesidades transitorias de Tesourería.

Título IV

Normas tributarias

Capítulo único

Tributos propios

Artigo 20. Taxas.

Un.— Elévanse os tipos das taxas de contía fixa, por prestación de servizos e por realización das actividades a que se refire o artigo 7.2 da LOFCA, ata a cantidade que resulte da aplicación do coeficiente do 1,05 ás contías actualmente esixibles.

Dous.— Para os efectos do

punto anterior considéranse taxas de contía fixa aquelas en que a cota tributaria non estea fixada nunha porcentaxe da base ou esta non se valore en unidades monetarias.

Tres.— Modifícase a tarifa de honorarios de veterinarios titulares na Inspección de Sanidade veterinaria de carnes frescas, incluído dentro da taxa 25.01 de servizos sanitarios no sentido seguinte:

«1.— Actividades conxuntas de inspección de control sanitario *ante mortem, post mortem*, seladura de canais, cabezas, linguas, pulmóns e fígados, etc., e investigación de residuos, esixibles con ocasión do sacrificio de animais:

	Peso p/canal (kg)	Cota pesetas p/unidade
1.1	Bovino	
1.1.1	Maíor con máis de	218 306
1.1.2	Menor con menos de	218 170
1.2	Solípedos/équidos	indefinido 300
1.3	Porcino	
1.3.1	Comercial de máis de	10 89
1.3.2	Leitóns de menos de	10 14
1.4	Ovino e caprino	
1.4.1	Con máis de	18 34
1.4.2	Entre	12 e 18 24
1.4.3	De menos de	12 12
1.5	Aves de curral	
1.5.1	Para aves adultas pesadas con máis de	5 2,70
1.5.2	Para aves de curral novas de engorda con máis de	2 1,40
1.5.3	Para polos e galiñas de carne e demais aves de	

	curral novas de engorda con menos de	2	0,70
1.5.4	Para galiñas de reposición	indefinido	0,70

2.— Inspección e control sanitario nas salas de despezamento, incluído o etiquetado e marcado de pezas obtidas de canais: 204 ptas. por tm de peso de carne antes de despezar, incluídos os ósos.

3.— Actividades de control e inspección da entrada, saída e conservación de carnes frescas e expedición, se é o caso, do cualificado de inspección sanitaria que deberá acompañar ás carnes ata o lugar do seu destino:

3.1.— Control e inspección sanitaria de operacións de entrada en almacén: 204.

3.2.— Control e inspección sanitaria de operacións de saída incluído o certificado de inspección: 204.

3.3.— Por cada visita destinada ó control e á inspección sanitaria da conservación das carnes en almacén: 204.»

Catro.— O Goberno galego, durante o primeiro trimestre de 1991, presentará no Parlamento de Galicia o Proxecto de lei de taxas de Galicia. Como anexo ó devandito proxecto de lei presentará a relación actualizada de tódalas taxas.

Dos procedementos de xestión
presupostaria

Capítulo único

Dos procedementos de xestión
presupostaria

Artigo 21. Contía mínima de
aprobación de gastos de investi-
mentos polo Consello da Xunta.

Un.— A realización de gastos
de investimento de calquera natu-
reza, en contía superior a 500
millóns de pesetas, requirirá a
aprobación do Consello da Xunta.

Dous.— A aprobación a que se
refire o parágrafo anterior implica
a autorización do Consello da
Xunta para contratar.

Tres.— Autorízaseselles ós órga-
nos de contratación, con carácter
xeral, a tramitación urxente, pre-
vista no artigo 26 da Lei de con-
tratos do Estado, para a contrata-
ción de obras de ata 500 millóns
de pesetas, aínda que o prazo de
presentación de proposicións non
será inferior a quince días.

Catro.— Para os efectos do esta-
blecido neste artigo son órganos
de contratación da Xunta as res-
pectivas consellerías.

Artigo 22. Contratación directa
de obras.

Un.— O Consello da Xunta, por
proposta das consellerías interesa-
das, poderá autoriza-la contrata-
ción directa de proxectos de obras

que se inicien durante o exercicio
de 1991, calquera que sexa a orixe
dos fondos, cando o presuposto
das mesmas exceda de 25 millóns
de pesetas e non supere os 50
millóns de pesetas.

Dous.— A contratación directa
das obras farase baixo os princi-
pios de obxectividade, publicidade
e concorrncia, e os proxectos
deberanse referir a obras comple-
tas, sen que os obxectos dos con-
tratos poidan fraccionarse en par-
tes ou grupos. En todo caso,
previamente publicaranse nos xor-
nais da provincia na que se vaia
executa-la obra as condicións téc-
nicas e económicas da mesma.

Tres.— Durante os primeiros
quince días dos meses de abril,
xullo, outubro e xaneiro, a Xunta
de Galicia remitiralle á Comisión
de Economía, Facenda e Presu-
postos a relación de expedientes
tramitados ó abeiro do presente
artigo no trimestre anterior. Na
relación consignaranse individual-
mente os nomes dos contratistas e
a contía dos contratos.

Catro.— Terán a consideración
de gastos menores os referentes á
contratación de obras, servicios,
subministracións, adquisicións,
asistencias e traballos específicos
e concretos non habituais por
importe non superior a 1 millón de
pesetas. Para a súa tramitación só
será esixible proposta de adxudi-
cación ou adquisición razoada e
certificación de existencia de cré-
dito e, para o seu aboamento, fac-

tura ou xustificación correspondente, podendo acumularse nun só acto as devanditas fases.

Artigo 23. Outros gastos de investimento.

Un.— Poderán estenderse a exercicios posteriores a aquel en que se acorden os compromisos de gasto que sexan consecuencia da subsidiación de tipos de interese que se concedan coa finalidade de apoia-los investimentos que se van realizar na creación de novas empresas e na súa ampliación ou modernización. Regulamentariamente fixarase o prazo ó que os citados compromisos poden estenderse.

Dous.— Por acordo do Consello da Xunta, adoptado mediante o procedemento descrito no número Un anterior, poderanse adquirir compromisos de gasto de carácter plurianual, cando se trate de adquisicións de vivendas para a cualificación de promoción pública, de adquisición de terreos para a construción de vivendas de protección oficial, de concesión de préstamos para a promoción de vivendas mediante convenios, para axudas económicas persoais e para o apoio financeiro a vivendas sociais, así como de concesión de subvencións para subsidiación de intereses de préstamos para vivendas de protección oficial.

Tres.— A Xunta daralle conta á Comisión de Economía, Facenda e Presupostos de tódalas operacións

que se realicen ó abeiro do presente artigo.

Disposición adicional primeira

Para poder dispoñer dos fondos incluídos na partida presupostaria de «Estudios e traballos técnicos» será precisa a previa aprobación polo Consello da Xunta, por proposta do conselleiro respectivo, sempre e cando a contía de cada proposta individualizada de gasto supere os 3 millóns de pesetas.

Disposición adicional segunda

As dotacións presupostarias da sección 01, Parlamento, libranse en firme e periodicamente a nome do mesmo, a medida que este o requira, e non estarán suxeitas a ningún tipo de xustificación ante o Goberno galego.

Os documentos contables que se expidan no ámbito de xestión para facer efectivas as dotacións presupostarias a favor do Parlamento de Galicia serán propostos e autorizados pola Consellería de Economía e Facenda.

Disposición adicional terceira

Un.— A concesión de axudas e subvencións con cargo ós créditos do capítulo de transferencias correntes e de capital consignados nos presupostos da Comunidade Autónoma farase conforme a criterios de publicidade, concorrencia e obxectividade, excepto as que se recollan expresamente con carácter nominativo na Lei de pre-

supostos, entendendo como tales aquelas con destinatario que figure inequivocamente nos anexos correspondentes da presente lei.

Dous.— Polo que respecta ás transferencias correntes, poderanse conceder directamente, nos seguintes supostos:

a) As que derivadas de convenios da Comunidade Autónoma con outros entes públicos e privados supoñan a afectación do crédito.

b) Aquelas que non estando incluídas nos puntos anteriores non excedan de 1 millón por beneficiario e ano, sempre que as concedidas por cada Consellería non superen globalmente os 10 millóns de pesetas no exercicio. No que se refire á sección presupostaria número 04, servizo 01, Secretaría Xeral do Presidente, as cantidades antes mencionadas serán de 3 e 20 millóns de pesetas, respectivamente.

c) As que superen calquera dos límites previstos na alínea b), e que polo seu obxecto non lles sexan aplicables os principios de publicidade e concorrencia, deberán ser concedidas por acordo motivado do Consello, dándolle conta á Comisión correspondente do Parlamento de Galicia.

Disposición adicional cuarta

As subvencións que se deriven do programa de electrificación rural, PLANER, serán destinadas de maneira exclusiva á electrifica-

ción dos núcleos rurais. Non se subvencionará, en ningún caso, a electrificación de urbanizacións nin vivendas illadas dedicadas a segunda residencia.

Disposición adicional quinta

A Consellería de Economía e Facenda, con cargo á Tesourería da Comunidade, poderalles conceder anticipos ós contratistas de obras financiadas polo capítulo VI dos presupostos xerais da Comunidade Autónoma de acordo coas seguintes normas:

a) O importe máximo que se vaia anticipar en cada caso non excederá do 25% do presuposto de adxudicación pendente de executar nin do límite de 100 millóns de pesetas.

b) O anticipo que se establece nesta disposición non poderá facerse efectivo ata que exista constancia fidedigna de que as obras se iniciaron, e poderán concederse dous novos anticipos dentro dos límites previstos na letra a) sempre que os anteriores fosen cancelados totalmente pola presentación e aceptación de certificacións de obra.

c) O mantemento e a concesión dos anticipos están condicionados a que o director da obra ou o órgano de contratación emita informe favorable sobre o ritmo de execución da mesma, previsto no contrato.

d) O contratista, previamente á

concesión de calquera anticipo, terá que presentar aval bancario ou de entidade aseguradora que se considere suficiente para garanti-los importes anticipados. Este aval terá carácter indefinido e estará á disposición da Dirección Xeral de Presupostos e do Tesouro da Consellería de Economía e Facenda, a cal ordenará a súa execución polo importe anticipado pendente de xustificar no momento en que o director da obra ou o órgano de contratación lle comunique o incumprimento dos prazos de execución contractualmente previstos. Para estes efectos, dentro dos primeiros quince días de cada mes informará á citada Dirección Xeral sobre estes extremos, por referencia ó mes anterior.

Disposición adicional sexta

Toda subvención que, con cargo ós presupostos xerais da Comunidade Autónoma, vaia destinada a empresas públicas da Comunidade ou por ela participadas requirirá informe previo favorable da Consellería de Economía e Facenda.

Disposición adicional sétima

Un.— As subvencións de capital que se concedan con cargo ó capítulo VII dos presupostos da Comunidade Autónoma satisfaranse logo da liquidación definitiva na que quede xustificado que se cumpriron as condicións xerais e particulares que lles sexan aplicables.

Poderanse efectuar pagamentos

parciais con cargo a liquidacións parciais cando concorran simultaneamente as circunstancias indicadas nas letras a), b), c), e) e f) seguintes:

a) Que o interesado o solicite.

b) Que se xustifique non só o investimento senón tamén os pagamentos efectuados ata ese momento con cargo ó proceso investidor aprobado.

c) Que o importe parcial da subvención que se vai satisfacer non exceda nin da porcentaxe de subvención aprobada para o proxecto nin da contía da anualidade prevista para o exercicio presupostario de que se trate.

d) O importe que se pode satisfacer por pagamentos parciais non poderá exceder en ningún caso do 80% do montante total da subvención concedida.

e) Non se poderán solicitar pagamentos parciais mentres non quede acreditado que o destinatario da subvención aplicase o proceso investidor á totalidade dos recursos propios previstos no plan financeiro aprobado.

f) Os pagamentos parciais quedan condicionados ó resultado da liquidación definitiva da subvención e para estes efectos estarán garantidos con aval bancario ou de entidade aseguradora que se considere suficiente e por tempo indefinido. Este aval estará ó dispor da Consellería xestora e soamente se

poderá levantar unha vez que a subvención se liquide definitivamente de conformidade. O citado aval garantirá o principal e os intereses calculados polo interese legal do diñeiro e por un prazo que medie entre a data da solicitude e o último día no que, de acordo coas normas de concesión da subvención, esta deba ser xustificada.

Dous.— A Consellería de Economía e Facenda poderá dictar as disposicións que se consideren necesarias para a mellor aplicación desta disposición.

Disposición adicional oitava

As entidades que constitúen a Administración institucional da Comunidade Autónoma transferiránlle á Xunta de Galicia o importe dos remanentes líquidos de Tesourería, resultantes das liquidacións dos correspondentes exercicios presupostarios.

A Consellería de Economía e Facenda poderá xerar con este importe crédito no programa 531B, «Imprevistos e funcións non clasificadas».

Disposición adicional novena

Autorízase ó conselleiro de Economía e Facenda para ordenar a cancelación das subvencións concedidas ó tipo de interese dos préstamos concertados a través dos convenios de axuda financeira e pequenas e medianas empresas e ó sector productivo agrario, en calquera dos exercicios anteriores,

mediante un pagamento dunha soa vez, actualizando o seu importe na data de cancelación ó tipo de interese legal do diñeiro, destinándose necesariamente o dito importe á amortización do préstamo.

A Consellería de Economía e Facenda daralle conta á Comisión de Economía, Facenda e Presupostos das cancelacións que se realicen ó abeiro desta disposición.

Disposición adicional décima

Quedarán integrados no patrimonio propio do Instituto Galego da Vivenda e Solo, creado pola Lei 3/1988, do 27 de abril, tódalas participacións ou títulos representativos do capital que neste momento pertencen ó patrimonio da Comunidade Autónoma nas sociedades anónimas «Sociedad de Gestión Urbanística de A Coruña», «Sociedad de Gestión Urbanística de Lugo» e «Suelo Urbano de Pontevedra».

Disposición adicional décimo primeira

As sociedades urbanísticas Gestur-A Coruña, Gestur-Lugo, Gestur-Ourense e Gestur-Pontevedra, para levar a cabo as súas actuacións de adquisicións de solo mediante expropiación, terán a condición de beneficiarias nos termos previstos na Lei de expropiación forzosa e no seu regulamento, correspondéndolle a potestade expropiatoria a calquera das administracións urbanísticas competentes.

Así mesmo, poderáselles adxudar directamente a formulación e execución de programas de actuación urbanística, a execución de plans de ordenación e a xestión dos seus patrimonios de solo mediante os acordos ou as concesións que para tal efecto establezan as administracións citadas.

Disposición adicional décimo segunda

Os funcionarios pertencentes ás escalas de «axentes de economía doméstica do Servicio de Extensión Agraria» e «monitores do Servicio de Extensión Agraria» procedentes da Administración do Estado, ó servizo da Comunidade Autónoma de Galicia, integraranse como escala que se vai extinguir no grupo B de funcionarios previsto no artigo 19 da Lei 4/1988, do 26 de maio, da función pública de Galicia, con efectos da entrada en vigor desta lei.

Disposición adicional décimo terceira

Os capítulos de investimentos e de transferencias de capital distribuiranse territorialmente de xeito que diminúan real e eficazmente os desequilibrios interterritoriais existentes dentro de Galicia.

Disposición adicional décimo cuarta

A Consellería de Economía e Facenda presentará ante a Comisión 3.^a do Parlamento de Galicia, durante o primeiro trimestre de

1991, un plan de distribución do Fondo de Cooperación Local, do programa 811B, por importe de 3.250.000.000 de pesetas, para dotación de infraestrutura básica nos concellos das áreas menos desenvolvidas de Galicia.

En todo caso, o devandito plan deberá ter en conta os niveis de renda e dotación de servizos.

Disposición adicional décimo quinta

A Xunta de Galicia desenvolverá un programa de ámbito galego co obxectivo de previr e evitalo consumo de drogas, que contemplará accións específicas dirixidas ás escolas e ás zonas urbanas e rurais máis deprimidas de Galicia.

Autorízase ó Consello Executivo a face-las transferencias necesarias para cumprir esta disposición.

Disposición adicional décimo sexta

En cumprimento do disposto no Estatuto de autonomía de Galicia, a Xunta remitiralle ó Parlamento os presupostos das deputacións provinciais e constituirá a Comisión prevista na Lei 8/1989, do 15 de xuño, sobre delimitación e coordinación das competencias das deputacións provinciais de Galicia.

Disposición transitoria primeira.— Retribucións do persoal contratado administrativo.

As retribucións do persoal contratado administrativo a que se refire a disposición transitoria terceira da Lei 4/1988, do 26 de maio, da función pública de Galicia, ata tanto non se conclúa o proceso de extinción previsto na dita lei, experimentarán un incremento do 6,26% respecto das establecidas en 1990.

Disposición transitoria segunda.— Transferencia de funcións e servicios do Instituto Nacional da Saúde.

Autorízase ó Consello da Xunta para que, por proposta do conselleiro de Economía e Facenda, poida instrumentar, coa estrutura presupostaria que estime máis adecuada ós fins perseguidos, tendo en conta as obras prioritarias en materia de saúde incluídas no PDR de Galicia 1989/93, a transferencia de funcións e servicios do Instituto Nacional da Saúde, no momento que esta se produza.

Da dita instrumentación daráse-lle conta á Comisión de Economía, Facenda e Presupostos do Parlamento.

Disposición transitoria terceira

En tanto non se produza o nomeamento e a constitución dos órganos de goberno e administración regulados nos artigos 10 e seguintes da Lei 4/1989, do 21 de abril, de creación do Instituto Galego das Artes Escénicas e Musicais, facúltase ó conselleiro de Cultura e Xuventude para xestionar os créditos presupostarios que figuran na sección 11, Consellería de Cultura e Xuventude, para financiamento do citado

organismo, coa mesma finalidade e estrutura económica cá que figura no presuposto do organismo citado.

Disposición derradeira primeira

Autorízase á Consellería de Economía e Facenda para que efectúe no presuposto de gastos da Comunidade Autónoma as adaptacións técnicas que procedan como consecuencia de reorganizacións administrativas, co fin de crealos programas, as seccións, os servicios e os conceptos presupostarios que sexan necesarios e autorizadas as transferencias de crédito correspondentes. Estas operacións en ningún caso darán lugar a un incremento do gasto.

Informarase de todas elas á Comisión de Economía, Facenda e Presupostos do Parlamento dentro do mes no que aquelas se producen.

Disposición derradeira segunda

A Xunta dictará, por proposta do conselleiro de Economía e Facenda, as disposicións necesarias para o desenvolvemento e a execución de canto se prevé nesta lei, que entrará en vigor ó seguinte día da súa publicación no *Diario Oficial de Galicia*.

(3)

Santiago de Compostela, 15 de xaneiro de 1991

Manuel Fraga Iribarne
Presidente

(3) O anexo incorporado a esta lei non se reproduce nesta edición.